

方山薛先生全集

方山薛先生全集卷六十四

詩

七言律

離家

歲暮扁舟下建昌天寒霜霰滿帆檣白雲回首家鄉  
遠黃葉關心驛路長鷓鴣階前思舊侶鵲鴿原上對  
離觴祗緣自奮匡時志今日無文弔楚湘

東菴道中別陳生貞甫華生用資胡生原昭  
梁溪雲暗雪生花遷客孤踪始去家落落乾坤唯自  
信茫茫湖海共誰嗟迂疎蚤分投荒野感慨非關戀

物華獨念諸生多惜別分舟且復繫河涯

西湖遇雪

北風吹雪滿西湖逐客閑遊興不孤朝擁黑貂尋舊  
迹夜燃青竹照歸途寒山排漢開瓊嶂凍月穿雲透  
玉壺因憶長安諸舊侶奇觀還似此中無

嚴杭州玉山雪夜攜酒淨慈餞別適沈紹興  
江村至

勝遊已得杭州主况復蘭亭太守來深夜同看湖上  
雪清歌獨感曲中梅頻年建業登江閣明日嚴陵過  
釣臺世路飄蓬無定跡且從呼酒盡餘杯

錢塘遇雪少嶠以新刊升菴集示覽上有孔  
文谷序因憶往年任五嶽嘗以升菴卅鉛錄  
見寄悵惘今昔感慨世途遂成短賦

楊子從軍在古滇錢塘江上見新編懷沙正擬清湘  
賦對雪俄驚黃竹篇十載卅鉛曾漫錄一生玄造竟  
流傳少嶠文谷真殊品海內憐才讓獨賢

宿浙江驛下

錢塘風雪滿孤舟海月旋看上驛樓五夜濤聲遷客  
去一天星影大江流篷窓蕭瑟呼兒語書劒漂零感  
宦游更有杞人憂未釋夢魂猶遶鳳池頭

錢塘夜泊寄水南

南歸准擬謁君山一病淹延竟閉關  
玉樹扶疎清夢裏仙槎縹緲白雲間  
兩都今日憑誰賦八索先年任自刪  
千里旰江吾獨往憶公無夜不思還

登釣臺

釣臺江水淨涵虛高士聊將適起居  
自笑古今皆旅寓還知天地即吾廬  
一絲詎意能扶鼎六物何心得魚愧  
我十年頻往復過湘猶誦治安書

懷養齋翁

南省尚書本自閑猶聞屢疏乞還山  
伯淳席上春方

煖茂叔窓前草正斑著作徧傳滄海外杖藜遙在白  
雲間憐予待罪肝江上悵望高蹤擬欲攀

楊止所職方出守衢州因余道經留飲郡齋  
值書屋新成賦以贈別

甘泉獻賦識楊雄十載還從姑蔑逢塞府舊傳征虜  
檄山衙新築草玄宮客來幽徑雲攜袖吏散空庭雪  
滿松尊酒相看無限意殷勤豈是慰途窮

書草草僧砌路勸緣卷

僧治泥塗爲坦道余芟稂莠長嘉禾禪心畢竟成因  
果仕路行將息鬼魔已見人謀無不至那知天定更

如何文皇自是西京主未必長沙作汨羅

謁象山先生墓

客路停車拜象山青松深處啓玄關徘徊虛墓人千古惆悵空林屋一間聖學淵源誰與濬吾心榛棘孰爲刪晦明絕續唯公在堂室重開見孔顏

送李節推

虞山才子蚤知名十載神交蓋始傾賈誼謫居方省過江淹別賦最關情金蓮有夢悲初志玉笋無緣負此生執法猶憐公等在夜來窺見太微明

春日

春日遲遲午漏賒山城遷客不開衙庭前有鳥鳴高  
柳門外無人掃落花點易都忘朱欲盡焚香謾遣火  
頻加寬閑歲月憐虛度空戴君恩報未涯

建昌學宮春祭觀樂

芹宮春色晝偏明隱吏新裁單袷成太守相攜觀羽  
籥諸生環侍奏簫笙辟雖曾濫隨鵷侶荒服俄驚隔  
鳳城獨喜絃歌無遠近齊韶不異有虞聲

送表感賦

十年通籍未登朝幾向華封遠祝堯常笑夢魂依侍  
從自甘形跡混漁樵銜恩擬著平淮賦問俗因思擊



壤謠但願萬方歌帝力敢期雙闕聽虞韶

病中作

性僻耽幽更好文投荒多病合離羣獨行幽砌憐芳  
草頻向閑窓卧白雲作賦不須悲賈誼棄繻何用學  
終軍一朝釋罪東歸去十畝溪田帶月耘

撫州道中夜行

崎嶇山路野花深月照孤臣戀主心待罪逾年春  
忽暮報恩無地病仍侵窮途轉覺難回轍別足翻思  
欲獻琛一任風波憑去住敢期霄漢有知音

暮春自述

遷客山衙午未開，鈎簾唯有燕飛迴。  
新茶摘下和雲焙，修竹分來帶雨栽。  
卧聽鶯啼傳翠幙，起看花落委青苔。  
靜中幽意應難語，時復拋書自舉杯。

與諸生陶子立蕭季南鄭伯源許希程夏子  
政鄭伯井午坐

庭院飛花春暮時，雨晴竹樹綠陰滋。  
已收羣籍除玄覽，偶共諸賢歌古辭。  
世上多岐湏定見，心中無事更何思。  
風光到處皆堪賞，莫向人間浪皺眉。

感事

五更燒燭長官催，爲報觀風使者來。  
祖逖聞雞心尚

切嵇康搔蟲夢初回那堪抱病隨征旅何忍低眉學  
賤臺自是孤臣當順受非關造物不憐才

睡起

不覺年來逸興多晝長時復夢南柯卸冠藉草非關  
醉排闥看山自放歌海內幾人能諒我世間萬事且  
由佗窮通總是氷漚理莫向君平問若何

四月六日石門驛舟中飲酒

去歲茲辰課百司今年今日石江湄持杯混世曾何  
意鼓櫂中流任所之酒到酣時頻欲卧照當嘉處更  
忘疲旁人已笑癡狂甚猶向尊前倒接羅

端午日諸生攜觴同集次伯原韻

吏散空庭燕雀栖諸生尊酒共招攜聊供彩綫靈均  
黍敢望香羅杜甫衣小沼綠荷連藥起隔林黃鳥引  
雛飛自憐羈旅情雖適十畝桑園願尚違

宿天界寺作三首

禪房秋夜竹林深夢覺諸天月轉陰自信塵寰皆淨  
土元知妙道即吾心山因有徑多迷路琴到無絃始  
是音何事上方持佛者猶從經典苦搜尋

秋日山中白苧涼徧游諸寺雨花香行來草際時眠  
着遇到松間輒坐忘諸念已從消處盡數年非復往

時忙有身有累憑誰說悟透無邊總不妨  
日日閒行到竹居笑呼兒輩且拋書香臺施食頻栖  
鳥石室藏經旋出魚到處法輪空有相悟時真諦已  
無餘老僧莫遣頭如雪坐破蒲團總是虛

贈章祠部時以御史謫官量移

宮袍憶共曲江遊分袂經今十五秋  
久別不知何事隔相逢翻悟此生浮  
臺中執法曾聽馬海上忘機任白鷗  
南省近來稱吏隱不妨頻過虎溪頭

靈谷寺作

金陵幽勝推靈谷今日重來信有緣  
野服不驚松下

鹿麋尊唯汲澗中泉偶逢朝貴渾忘姓相對維摩自  
解禪何事路人猶識認殷勤指說量移年

贈唐生國華

盡日山中隨我行山中草木自生成要知雨露無全  
力須識根苗有定形執着固難窺聖學圓融亦易徇  
吾情近來談柄縱橫甚莫駕三乘侮六經

水南以中秋月詩見寄次韻答之

莫道年來意興微董生猶下舊時幃清齋自校書千  
卷獨夜相看月一圍取燭每思張子厚裁詩却憶謝  
玄暉願將淨色澄江練補作天孫雲錦衣

宿翠薇寺僧定中兼通醫學

竹房開在翠薇東，秋晚閒過宿贊公。石上白雲迴曲徑，樓前明月照孤峰。藥材徧拾無名草，色相元知不住空。相對忘言唯自解，此中消息幾人通。

金山

金山俯瞰大江流，豈爲人間作勝游。萬水西來真底柱，九州北去正襟喉。鐘聲樹影憑誰詠，廊廟江湖祇自籌。昨夜三台垣畔望，一星光射鳳池頭。

渡淮

滾滾長淮日夜流，十年兩放北來舟。虛靡歲月慚無

補直任行藏敢有求辛苦半生頭欲白艱難百折志  
須酬茲行擬獻凌雲賦開閣何人爲國謀

劉應谷戶部聯舟北上以詩見貽賦此答之  
江上忽逢劉長卿神交真慰十年情聯槎不覺銀河  
迥對語頻瞻玉樹清大曆詩篇元出色東山棋局久  
知名匡時更羨經綸手安攘功勲待爾成

孟秋陪祀 太廟夜候左闕

苑栢參天暑氣消星流闕角夜岩堦都宮漏轉千門  
闢清廟香浮百鳥朝周典昔曾窺制作虞廷今獲聽  
簫韶多方盡受無彊錫縮酒年年遠貢茅



送蘇舜澤總制宣大

天書新捧下彤墀塞上防秋正此時舊識先生唐翰  
墨今看總帥漢威儀未論肘後黃金印且獻尊前白  
玉卮若使止戈方是武羌胡遠遁報君知

夕月壇陪祀

薄暮西壇玉兔明摩挲桂樹若含英珮環聲動千官  
合河漢風生萬籟鳴閃爍瑤光開隱暗分明瑞氣兆  
昇平胡兒切莫窺盈缺都護彎弓已出征

送王韋菴司訓鄱陽奉乃翁就養

江東蚤歲稱才子闕下今除博士歸捧檄聊酬毛義

願傳經應設馬融幃閒觀彭蠡頻移棹靜對匡廬不  
掩扉更喜芹宮春酒熟捧觴時着老萊衣

玄極殿陪祀

禁漏沉沉夜未央侍中引入繞西廊更無九陌紅塵  
色唯見千門玉燭光肇啓明堂周制作重新原廟漢  
宮牆微臣何幸叨瞻拜沐浴衣冠染御香

午門謝胙遇雪

瑞雪紛飛御道長千官臚唱引成行孟冬祈報初頒  
胙上帝居歆輒降祥玉節已瞻仙苑樹素絲方稱侍  
臣裳退朝擬著鄒枚賦抽筆徘徊思渺茫

送裴汝州同年

建業花前共鹿鳴，長安雪後送君行。  
汝南應望冠恂至，漢室還聞召父名。  
一郡專城真爾責，兩河經制更誰成。  
天涯鴻鴈分飛處，握手相看無限情。

彭城道中

彭城南去家鄉近，山路多從石裏過。  
踏凍早行驚玉峽，披星回望見銀河。  
範模自許身爲度，簡拔應須禮作羅。  
珍重璽書何以報，願教寰海聽菁莪。

次濠梁驛陶克允侍御夜訪時陶領募軍之

命二首

濠梁遙望沛時宮  
宛見當年御六龍  
迴合河淮真若  
帶縱橫岡阜本來雄  
開基固是由天定  
驅虜方知絕  
世功當宁拊髀思猛士  
特教柱史出臨戎

江西舊識題橋客  
濠上今逢秉鉞郎  
對語不知更漏  
緩相依豈爲別離長  
禁中此日誰頗牧  
塞外頻年盡  
犬羊自古英雄出  
徐沛願君一鼓繫名王

雪中渡江寄別克允

北風吹雪暗江頭  
南去征夫望驛樓  
千里歸心忙欲  
渡一時吟興渺難酬  
懷人宛在迷瑤樹  
惜別無從贈  
玉鉤惟有梅花春  
早發折來應寄剡溪舟

華補菴過訪以見懷詩出示次韻贈答

深林凍雪滿寒條門對青山景更饒  
歸客初停潞河棹故人忽泛剡溪潮  
開襟漫興情如舊促席幽談思獨遙  
羨爾急流能勇退籌邊猶自問蘇樵

天台道中

春陰連月多風雨自入天台轉更多  
憑軾祇聞飛瀑響褰帷頻見亂流過  
山谿屈曲蒙苔蘚郵傳蕭條長薜蘿  
獨愛野人無一事柴門半掩織青蓑

天台山中

天台自昔名仙籍今日來時逢暮春  
流水前行如引

路飛花亂點欲迷人芙蓉紫翠重重見圖畫丹青處  
處真便合結廬留此住獨疑猿鶴厭朝紳

天台憶近魯寓居學廨二首

學衙清寂杜門居海上諸山我獨如雲裏陟崖頻挽  
索雨中過澗謾傳輿登臨正好搜奇蹟跋屐應緣畏  
簡書知汝靜中應自得河東有賦待吹噓

赤城舊說多奇勝此日看來絕世無清水澗邊逢姹  
女白雲谷口見樵夫尋芳物外堪攜汝避俗年來豈  
故吾點檢行藏成一笑今非通達昔非迂

衢州公館次寇惕齋韻

策舍曾爲梁父吟自慚復出二毛侵年來無策酬初志海內何人諒此心倚壑孤松還自得傲霜寒盡不能禁夜深猶作姬公夢但願天街朋盍簪

贈程習齋侍養家居

春風久矣思程子漱水重逢意更真座上論文還似舊靜中悟道獨加新斑衣不博三公貴白髮常依百歲親林下古稱難見一于今江海有斯人

處州道中值誕辰寄近魯

枯蒼山裏逢生日五十馳驅柰老何理路明來逾切直世途歷徧轉迂踈神游上國驚環珮夢醒中宵憶

薜蘿念子受書無伏漶悠悠歲月恐倖佗

石門洞觀瀑

石壁分明閭闔開白龍飛瀑出雲來銀河直下三千  
丈玉峽平翻幾百迴空谷獨游纔是靜斜陽久立不  
知回欲尋康樂無踪跡漫憶當年作賦才

青田道中

兩涯壁立萬重山屈曲溪流注石間風動潮聲知海  
近日移帆影見雲還年來鎖院翻成冗忙裏登途轉  
覺閒莫謂孤舟無自適每逢鷗鷺一開顏

登鴈山



海上山多此獨名登臨真若在蓬瀛龍湫雙瀑穿雲  
瀉鳥道千松應谷鳴隱見岡巒棲虎豹歌傾激澗躍  
鯢鯨幽竒自是天珍秘靈運不來何重輕

戴辰峰下獨酌

戴辰峰下謾徘徊獨坐開襟自舉杯倏忽幾翻雲出  
沒晡時無數鳥飛迴每逢真境偏增感一到空山便  
可哀人事去來何足問古鍾橫地盡莓苔

宿鴈山禪院

逢着禪牀且便休空林獨夜景偏幽月明松影窓前  
落谷靜泉聲枕上流槐國升沉俱是夢塞翁失得已

無憂塵緣未斷猶奔走默對山靈一點頭

聞白雲雲外二僧在龍湫三十年矣陡絕不能登訪

白雲雲外在山隈欲往從之莫扣扉有悟不須相對  
面無緣猶自願留衣人當了處方知汝事未休時肯  
息機我亦塵凡難解脫桃源只尺路皆非

寄壽讓公

避俗當年借上方偶因獻策入明光黃金橫帶非吾  
願白足談禪羨爾強臘樹階前春又到曇花鏡裏日  
初長世間甲子憑流轉穩坐蒲團自不忙

寇惕齋築蘭坡精舍養疴以詩索題爲次原韻

遙瞻西晉草玄廬清絕分明楊子居一任雲霞封戶  
牖更多蘭蕙滿庭除幽禽寧翼風初定靈藥生苗雨  
正餘爲愛主人休沐暇靜觀物理自如如

嘉興逢黃協恭將赴河南次呂巾石韻

正在懷人攜李城忽聞西水棹歌聲自緣荀淑知黃  
叔敢謂東萊識陸生伊洛此行堪訪道槐根一夢豈  
關情大江南北多桃李花發春風屬眼明

送寇惕齋僉憲入賀

河內從來說寇恂不圖今復見斯人官淹執戟思匡  
漢文逼玄經陋劇秦獨解引商依古調厭聽子夜逐  
時新茲行持獻華封祝僊仗應宣舊禮臣

送曹自山叅政入賀

金陵同上鳳皇臺七步元知子建才世路不齊憑去  
住天涯相憶幾徘徊西湖煙榭方重聚北闕僊槎却  
又催稽首萬年稱獻後莫思劍閣賦歸來

浙中諸生頻過草堂援筆書示

浙中視學兩年歸不問人間是與非吾道自應持定  
守人心豈盡息真幾誰云直已時方厭敢謂大音聲

正希俯仰只求無愧忤平生原不羨輕肥

睡起自述

草亭新構竹林中五月涼生薜荔風遣興不須頻對  
酒忘情何必更書空古來世事知多少老去人言任  
異同豈是閉門常避客日長貪睡晝偏濃

家居得嚴徐歐陽三學士書

直廬清絕逼仙宮不放音書與世通翰墨忽驚三學  
士蓬蒿何意一孤踪寸心常願酬知己尺朽難將補  
化工幾向紫微垣畔望只求霖雨賜年豐

感事

解官兩載杜門居終日頽然懶著書不着衣冠向城  
闕且披簑笠混樵漁人情閱徧忘忻疾吾道由來任  
卷舒唯有天光明不昧無分晝夜照庭除

楓橋夜泊

夜出吳關愁泊船千家不復十家全江村寂寞無漁  
火城堞蕭條有戍煙抱鼓遺民唯望援牽衣稚子寔  
堪憐有司亦恨徵科急爭柰軍需日索錢

夜夢白衣山人對余誦吊秋崖詩醒猶宛然  
無一字遺失亦奇事也記之

玄墓山空月色明烽煙照見闔閭城徙薪自古無恩

澤宿草于今有甲兵生死已隨朝露盡是非猶逐夜  
烏鳴何年精衛能填海常使人間恨不平

十四夜月李懋卿攜酒勸駕因思去年此夜  
亦與同飲

入夏恒暘初得雨輕雲深夜旋開明仙槎擬欲通銀  
漢帝座遙瞻近玉衡呼酒獨憐餅未罄忘眠爲看月  
將盈人間此際應多寢聊與相知續舊盟

中秋夜見月華贈懋卿

雨霽中秋月正團滿天星斗盡芒寒香飄仙桂花千  
樹色動卿雲采萬般振羽庭前觀舞鶴吹簫雲外聽

鳴鸞百年此夜真奇景莫作尋常一樣看

十六夜月

月明不必問虧盈景到秋深分外清  
草上露珠垂顙顙天邊雲錦簇  
英英鵲飛直遶銀河去鵲立偏當玉  
宇鳴何處笙簧發幽響却疑身世在蓬瀛

維陽逢尹洞山祭酒

廣陵驛下逢知己愧我無端更出山  
豈是曲江花裏伴漫隨上國殿中班  
憂時忽爾思頗牧樂處依然見孔顏  
太學諸生君得否少陽祠在練湖灣

富莊驛書壁



淵明乞食饑驅去我已無饑孰爲驅海上烽煙近城  
郭柙中虎兇徧寰區征裘蒙結將何主瘦骨峻嶒尚  
故吾忽聽霜前鳴鴈急摩空豈爲稻粱圖

渡滹沱河因憶浙中之夢

武林往歲夢滹沱今日漸車渡此河悟到盈虛真有  
數看來行止豈由佗性甘苴宿踰梁肉身便管麻厭  
綺羅何意復從金馬客愧聽漁父棹頭歌

涿鹿道中有感

北來蒲路流亡屋南去陰風海作波一氣渾淪憑鼓  
蕩二儀軫蓋任推摩將軍戎服歌燕曲士女宮粧舞

越羅我獨驅車欲何往十年贏得鬢毛皤

徐李二相公枉顧靈濟宮

雙玉聯翩出禁中下車訪舊入玄宮直踰杜甫江干  
客不數王猷雪夜逢燕國昔曾聞市駿漆園今豈見  
猶龍風塵踪跡終甘隱密勿何堪在上公

靈濟宮夜坐有感

草衣已分終丘壑此出敢言無宦情京國舊游人異  
趣鄉園今夜月同明浮名尚被形骸累真氣難隨變  
態更身世百年彊半過靜中還自悟無生

夜坐偶成

平生每自檢行藏潦倒于今豈盡忘一日九迴腸欲  
斷百年千慮事難量仰天不愧顏猶赤混世無成老  
更忙萬里鄉關歸未得孤燈默默度昏黃

費少石招飲詹事省中同曾二潭

故人招飲入宮坊明月空庭滿樹霜興到勸酬拚共  
醉情深形跡總相忘放懷自許同曾點傲睨何嫌學  
楚狂最喜長房挾仙侶笙歌時出奏清商

贈朱醫士

山人偶出長安市一卷方書肘後懸康濟止憑囊裏  
藥遨遊不計杖頭錢忘機每與鷗爲侶浪迹長憐鹿

有緣多少五陵豪俠客羨君風致是神仙

洛陽道中懷王槐野

春風千里洛陽花乘傳寧非邵子車野老有情頻致問  
山人何意又開牙前過太華應尋主此去終南欲寄家  
更覓張騫舊游路直從銀漢問仙槎

贈尉氏李令因柬余玉崖司徒

西征夜出伊南路故舊相逢慰客情學道近稱言偃  
邑談兵元是尉繚城莫將聚散悲前事且展經綸畢  
此生遙憶美人雲夢裏恍如疇昔在金陵

函谷關公館書壁

函谷關頭雞未鳴夢魂長繞受降城若教狼望無烽  
火何必燕然有勒銘一代文章徒自許四夷經畧竟  
誰成從今謝却毛錐事提劍登壇且學兵

飲槐野書院留別

少華山前一草堂居人指是輞川莊繞門千朶芙蓉  
碧夾岸雙垂書帶長春莫忽來江左客當年同是殿  
中郎吾今出塞君歸直無限離情對舉觴

飲唐故宮觀紫牡丹

九龍池上宴初開景物翻令逸興哀花萼樓荒遺石  
礎沉香亭廢長莓苔伶人已變梨園調俠客空思舞

馬杯唯有魏家花尚在却疑根是舊時栽

咸陽懷古

西入咸陽更西去朔風吹雪暮春寒征裘何日還單  
袷野服當年已挂冠白髮蘇卿爲屬國黃頭鄧豎作  
中官漢廷故事今如夢彈劔行歌且自歡

登說經臺

特訪終南老氏宮萬山深處白雲封說經人去臺空  
在問禮誰來路自通百二關頭瞻紫氣五千文裏見  
玄容猶龍自是真神物何怪紛紛論異同

鄜延道中

萬峰重疊陣雲橫朔氣常凝細柳營北隴遺民多索  
寞西涼悲調轉淒清月明孤騎關山立風暗重裘沙  
塞行自是吾生應到此歸途何必問君平

度秦嶺自嘲

秦嶺千尋逼紫霄迂迴鳥道欲漂搖思家韓愈渾迷  
目畏井彭錢不繫腰空結樵漁江上屋漫披軍旅帳  
中貂自思不識誠何意猶拾當年棄去瓢

延州閱兵

少年欲斬月支頭垂老來防塞上秋充國有才終破  
虜班超無意欲封侯歡呼帳下三千士揮霍曾中百

萬猷但得功成報 明主飄然還向五湖游

楊太僕宅觀黃牡丹

曾看譜牒紀姚黃今見楊家開滿堂豈是中央饒正  
色却於偏地發奇芳共誇金焰浮仙鼎爭羨宮袍出  
上方內苑若教容此種百花能得侍君王

夜過橋山謁軒轅陵因登會仙臺

橋山千載柏猶存長傍軒轅古廟門滿塢閒雲封白  
晝一溪明月照黃昏臣工當日攀龍馭樵牧于今識  
寢園獨有雄才如漢武築臺偏自薦蘋蘩

謁孟姜女祠



望夫臺下草芊芊北望長城益可憐築塞豈知秦鹿  
走防胡那識漢龍眠咸陽宮殿皆烽火回嶺祠堂獨  
歲年始信人心真不死一迴瞻拜一凄然

清澗山中諸生迎候

行盡千山與萬山胡沙撲面髯毛斑正憐朱紱棲塵  
土却遇青衿繞澗灣解甲登臺聊講藝振衣坐石一  
開顏諸生若解吾真樂沂水春風卽此間

榆林道中

萬里胡沙接混茫榆林北去盡戎羌旄頭星已沉青  
海虜篋聲猶度受降持節每思前屬國彎弓欲射左

賢王漢家養士傾民力忍使河湟棄舊疆

宿榆林城

榆林月白戍樓空大將旌旗照暮虹客思遙馳雲影  
外杞憂多在角聲中百官競上籌邊疏三錫常酬服  
遠功何事孤臣猶不寐擁衾展轉五更鐘

宿魚河堡

從征夜息魚河堡塞北風高鐵馬寒白霧漫空沙暈  
月黃河穿澗水飛湍燈前淚墮清人賦夢裏神游玉  
女盤惆悵孤忠誰與語五雲深處望長安

寄包蒙泉御史

二十年來不相見中間時事總堪嘆君何久謫莊浪  
戍我亦今爲白翟官醕酒三春聊遣興氊衣五月尚  
憂寒故知方幸他鄉遇猶阻黃河西水難

書固原衛壁

留曹十載夢行邊此日登臨不偶然白氣西來連漢  
時黃風北捲淨胡煙束書半是平羌策揮翰都成出  
塞篇莫謂喜功勤遠畧却令庸懦笑張騫

留別趙浚谷

十載相思限朔方不圖今歲數登堂武誇漢代無充  
國文陋吳興有子昂百二山河憑作主三千禮樂屬

更張願君林下澄神慮側耳江東聽酌量

慶陽道中感懷

盡日行來無室廬沿崖土洞作民居黃童力竭徃猶  
急青草根枯稅未除愧俸因思韋應物抱病不減馬  
相如慶陽太守方憂旱忽復移文更苦余

次韻答馬谿田

山居一任候蟲鳴不爲人間寵辱驚白髮傳經追伏  
湛清心稽古陋桓榮往來寒暑同消息上下鳶魚適  
性情海內于今誰正學三原蚤已進誠明

飲侯松泉副憲公署出示謝與槐詩次韻贈

之

省署幽深敞夜筵雲安麴米味方鮮正忻卽席依無  
可忽漫開圖見惠連秦隴使車容我並河汾家學美  
君賢平生傾倒應難盡一曲清商祇自憐

雪夜次寧州公館見壁刻馬端肅公巡撫時  
詠竹詩有時來暫爾棲黃雀日後應須集彩  
鸞之句重有感焉因爲次韻

蒲庭燕石混琅玕冬夜蕭蕭雪作寒老去虛心徒自  
負從來直節竟誰看乳鴉爭噪休猜鳳野鳥羣飛莫  
擬鸞惆悵鈞陽今不見相知唯有此衷丹

榆林道中

歲暮天寒朔氣清風吹戈甲盡金聲千屯虜騎占雲  
散萬里邊疆踏雪行安攘有懷空墮淚挽回無計獨  
含情停車呼酒非圖醉聊藉荒尊度此程

呂玉牕大叅邀登回中

關山雪後入回中天外瓊峰百萬重青鳥尚依王母  
殿紫雲猶覆武皇宮千年古栢生瑤草幾處殘碑卧  
石龍獨喜主人元姓呂欲驟黃鶴問鴻濛

宿壽山寺

日暮征人投梵林竹房幽閉白雲深百年已悟無生

偈一夕都消有覺心  
藤鼠嚙床驚曉夢  
山禽窺戶囀春音  
世間造物憑流轉  
且坐蒲團自鼓琴

聞南中論疏啓行

商鞅入秦曾夢見  
今年夢見我離秦  
登車不忍遺民哭  
解組聊舒要路嗔  
萬里空歸孤骨瘦  
九天應鑒寸心真  
平生出處年來混  
且盡芳尊趁米春

甌冠山副憲遣人護送漫書謝復

兩都青瑣識君賢  
西土重逢亦有緣  
終始此心唯自信  
是非吾道任人傳  
阮生不畜窮途恨  
賈傅何須去國爲  
知己別來瞻漸遠  
秦城煙樹渺無邊

接罷官邸報見巡撫王孝泉公薦疏

自分世人皆欲殺如何杜甫獨憐才  
孤根總向霜前發直幹難從棘裏栽  
星隕寧堪爲柱石玉焚元不化塵埃  
知公此疏應相信豈爲人言亦浪猜

鄭州公館見壁刻楊邃菴詩次韻

解組歸來鄭地過廢興因感舊山河  
胸中自是經綸少世上元非窒礙多  
夜壁頻年投暗路寶刀憑孰斬妖魔  
不堪四海蒼生溺援手無從可奈何

鄭州道中因諸生挽留感賦

鄭州東去多茅屋溱洧年來勾樂無  
沃土已知爲瘠



土餓夫何暇作狂夫孫僑祠圯生春草叔段臺荒噪  
暮鳥唯有人心仍似舊緇衣猶欲贈司徒

周南驛中感懷

先後三年兩去官中間情事亦多端短長那用逢人  
說出處何須更自歎不早放舟追范蠡空將彈鋏笑  
馮驩著書亦是閒多事混跡還應擬鵝冠

留別王懷雲僉憲

寧陵道上逢王粲正我東歸解綬時留客開尊傾宿  
醞呼童出紙索新詩情投翻恨交何晚別促因思會  
未期海內如君真罕見白頭傾蓋幾相知

歸德道中遇毛葫蘆遁歸

雲深薄暮暗斜暉  
愁見天涯倦鳥飛  
北走士騎新戰馬  
西歸人著舊征衣  
里中到處輸將急  
海上何年羽檄稀  
終老莫嫌生計少  
春山徧產首陽薇

宿濠梁驛書壁

十萬匈奴寇朔方  
書生整旅日倉皇  
烽煙數起塾臺上  
虜策時吹卧榻旁  
自分即時填虜套  
不圖今夜宿濠梁  
免歸幸得南都疏  
桃李春風返故鄉

方山薛先生全集卷六十五

詩

七言律

二月二十八日過東葛驛見壁間黃梁夢圖  
聞是日禮闈揭曉

世路從來莫認真  
花開花謝幾迴春  
寧知今日旋車者  
便是當年獻策人  
道誼尚多陳蔡友  
交情元少翟門賓  
邯鄲已醒黃梁夢  
五十餘年空苦辛

江浦謁莊定山先生祠

西歸瞻拜定山祠  
春草萋萋日暮時  
荒砌已無人履

跡空梁唯有燕巢泥綱維自我神常在出處憑誰衆  
所知萬古長江流不息乾坤元氣正如斯

浦口公館偶書

往年清議出南都爲問于今尚有無秋到霜林應索  
寞晚來雲樹自模糊荆榛莽莽青蠅集梧竹蕭蕭彩  
鳳孤此日言歸何所事小車花下邵堯夫

渡江宿燕子磯

孤客西歸落日黃渡江艤棹燕磯旁佩刀直上雲長  
廟解帶還尋惠遠房憶昔中流空擊楫從今靜夜自  
焚香豪華六代今何在回首河山思轉長

承恩寺有感

從來聽得先儒說一命雖微可濟人二十一年多費  
處百千萬里苦傷神長嫌巢父何高蹈纔信楊朱是  
愛身俯仰半生迷幻夢覺來元不失天真

過金陵同年許石城示寫懷詩次韻答贈

人與乾坤本是三不知何似始能叅偶隨良驥同空  
北便認柴車作指南到處羣然嘲拙宦逢君獨爾羨  
奇男江湖風月誰收管野服山中我正堪

遷謫從來已再三麤豪元不慣庭叅投簪自合歸江  
左把釣何須在渭南花柳逢春憑造物鬚眉滿世孰

爲男許由久矣將瓢棄容我相尋似亦堪

天界寺作

不到山房已十年茂林脩竹自依然  
花開花落知多少雲去雲來任變遷  
坐對心經無可語倦棲禪榻正堪眠  
何須別訪煙霞境即此終身已是仙

初夏偶成

脫却宮羅着芰荷  
考槃仍在舊山阿  
晝長閒看金剛偈  
日暮微吟梁父歌  
見世慚非真國手  
前身知是老維摩  
百千萬劫今消盡  
一任空玄柰爾何

五月六日夏至金陵客邸

端陽正值一陰生，獨客幽棲倍愴情。  
士女誼闡方競渡，干戈擾攘欲臨城。  
繁華舉世知炎夏，消息何人解履冰。  
且盡蒲觴聊自醉，會須剝復見昇平。

贈慈谿張山人

四明山外野塘幽，中有幽人被鹿裘。  
適趣煙霞相伴侶，忘機鷗鳥對沉浮。  
花飛水上通仙路，月出灘頭放客舟。  
因憶絃歌舊時令，特過吳下訪言游。

得家報五月三日被寇

無官今且又無家，纔覺身輕似落花。  
漂泊祇憑流水轉，逍遙一任夕陽斜。  
書亡鄴架相傳籍，業廢青門舊

種瓜唯剩本來真  
面目煙波隨處是生涯

僦居玄津

僦居長日掩柴扉  
斷絕人間是與非  
隔竹流鶯更調轉  
穿簾乳燕逐羣飛  
直腰不慣黃金帶  
瘦骨唯堪白苧衣  
倚榻坐忘頻睡覺  
夢中常自悟禪機

對雨獨酌東徐陽濱戶部

對雨開軒自舉杯  
酒酣不顧玉山頹  
避兵尚阻山中興  
戴笠那知世上情  
陋巷已無紅拂面  
閒堦漸有綠苔生  
呼童門外休羅雀  
早晚南州高士來

金陵逢魏豐村太學二首



廬陵門下舊聯床幾向憑虛倚夕陽流水萍踪多聚  
散浮雲世事修更張盧生已醒邯鄲夢魏愷寧耽散  
騎郎豈意留都仍共賞廿年回首轉滄茫  
關西歸客杜門居笑展平生舊讀書管子有緣逢鮑  
叔賈生無語吊三閭花前尊酒頻相對物外交情祇  
自如老我獨憐君尚壯題橋行且赴公車

次曾兵部仲野見贈韻二首

人生清濁亦隨時明水憑將混作醅久徹臯比忻藉  
草漫辭宮錦欲披緇鴻飛不必嗟何慕麟出猶曾歎  
莫知鼓瑟唯同魯點樂風雲意氣自相期

到處山林烽火急杞憂如醉亦如焚願勤上國調元  
手便作中原露布文園廢已無瓜種在籬荒寧有菊  
苗分相知近晤匡廬客精舍仍前傍紫雲廬山有紫雲菴往余  
在其左築觀易臺

### 送袁近沙學諭

秦淮客舍長青蘿春暮俄驚博士過自喜初成單袷  
服相攜同聽浴沂歌憐才君正如袁閩面壁吾方效  
達摩忽漫相逢又相別武林桃李近如何

### 許石城宅觀牡丹

石頭城裏逢知己正值濃花三月春劇飲並歌南北

調幽談悉置古今人踈狂誰道難諧俗落魄吾生本  
任真更問藥闌何日放肯容乘興往來頻

贈江山人

山人耽隱久忘機笑我年來始得歸頻過草堂惟索  
茗獨行松徑懶穿衣自知心裏無諠寂那識人間有  
是非興到每歌長短調郢中白雪和應稀

鄭伯原遠訪秦淮賦贈

十年不見鄭康成千里俄煩過石城學問玄微超近  
代文章蒼古逼西京吾今已謝人間事君亦渾忘世  
上情總有幽懷何足論開尊只合酒頻傾

送高水原赴天真

梁鴻溪上逢高適，朱雀橋邊喜再逢。  
出處兩途渾是夢，功名一笑總成空。  
山林獨往心常靜，湖海朋來道不窮。  
聞說天真又開講，放舟隨水下江東。

次韻題天台潘山人卷

徵書谷口莫相呼，朝市寧堪路鬱迂。  
青蕨自甘生計薄，白雲常伴野心孤。  
茅齋正稱興居便，簞笠何嫌禮貌麤。  
長日坐忘憑窠寤，無人無物亦無吾。

洗耳那堪聽辟書，飲牛驚避更何辭。  
蚤年說着還疑此，今日看來信有之。  
靖節正宜頻對酒，堯夫只合自

吟詩吾生不用君頻問獨恨當時罷去遲

送周迪齋守寧波

司徒分竹赴明州秋曉揚帆度石頭西蜀文翁新出  
牧東山安石舊曾遊潢池赤子應投劔渤海蒼生盡  
買牛宣室知名行召入漢廷循吏更誰優

送潘徵君歸天台

徵君歸向天台去白髮寒窓自著書喜對青山磨鐵  
硯懶從丹闕佩銀魚唐虞事業浮雲過管晏功名一  
笑餘更願坐忘諸念息靜中應別悟玄虛

贈田生

往年曾較武林文聲律場中未盡君偶過秦淮重聚  
舊却憐詞賦獨超羣已知弘正生田布翻愧侯芭識  
子雲歸去逢人如問及銀魚久向碧山焚

贈張生

從前已識張平子再至君當讀禮年校藝未窺三策  
學憐才空憶四愁篇容顏歲月驚遲莫世事江河感  
變遷尊酒相逢淮水上願資博雅究殘編

陳玉泉僉憲將赴蜀次韻贈答

劒閣微茫逼鬼星憐君遲莫遠明刑不耽庾亮新開  
府應上楊雄舊草亭西蜀風霜今且肅東吳烽火幾

時寧浮生踪跡元無定總是飄流海上萍

次韻答何柘湖二首

雲間詞賦逼西京視草官聯玉署清何事急流偏勇  
退却於逐客共幽情厭騎市上交馳馬閒聽枝頭對  
語鶯東海尚聞兵未息相攜時眺石頭城

避寇攜家寄舊京憐君骨瘦一官清攜辭向往超玄  
理上疏歸來厭俗情欹枕卧雲聽野鶴荷鋤攜柳待  
山鶯猶嫌問字人爭訪短褐時時避出城

秦淮旅次與吳山人話舊次季泉宗伯韻

春莫飛花水上浮與君相倚立沙頭壯遊舊憶逢燕

市流落今同在  
蔣州輕便自甘青  
簫笠蒙戎猶曳黑  
貂裘年來又謝人  
間事烽火郊原亦  
隱憂

壽江九川侍御母太孺人

雲開上谷婺星明  
光照瑤池若木英  
庭下綵衣周柱史  
筵前金馬漢臺卿  
喜逢青鳥頻通使  
會見黃河幾度清  
一曲遙聞天籟響  
吹笙應是董雙成

讀漢史有感

讀書須自有真知  
纔信陳言便起疑  
賈誼莫嫌流涕早  
逢萌還恨挂冠遲  
競從麟閣誇圖畫  
誰向桐江理釣絲  
千載祇憑斑馬紀  
此中消息幾人窺



題朱希桂侍御二親雙壽圖

洞庭衡嶽勝蓬瀛瑞秀偏鍾希水英日朶高堂雙鶴  
舞雲開南極一星明豸衣不數斑爛絲內酒真誇玉  
露莖蕭史鳳臺常作伴黃河應見幾廻清

休寧戴處士年七十矣乞詩以壽其親

戴逵不赴王侯召自向山中作老萊逐日靜觀玄鶴  
舞四時常對碧桃開青燈黃卷傳家學白髮斑斕獻  
壽杯老我題詩寄高隱齊雲瞻望一徘徊

久雨偶作

久雨莓苔滿石屏焚香獨坐看心經雀誼門巷空齋

掩魚躍池塘新水平自古功名皆泡影吾今踪跡任  
飄萍青天白日終難蔽應照人間無限情

余歸故居吳磐石遠訪約遊金陵予以事不  
果作詩寄之

延陵高士古風流河漢清宵識斗牛爲訪陶潛三徑  
菊每乘范蠡五湖舟慚予偶負春初約愛汝還期江  
上游聞說維揚寄踪跡瓊花觀裏幾凝眸

送太學包生還建昌

舊識肝江多國士今栖建業却逢君壯懷欲上陳東  
疏幽意偏同謝朓羣雨霽離筵連夜月風生別棹滿

江雲歸經吳越人如問爲說年來懶作文

夢鍾季烈

伯牙不信鍾期死猶抱絲桐憶故人落盡燈花明忽  
滅悟來迦葉假還真章江此日空流水燕市當年共  
暮春夢覺寂寥思往事一窓殘月倍傷神

送謝陽溪司訓嘉善次許石城韻

清宵向共秦淮月絳帳今開攜李城謝氏惠連元積  
學程門顯道久知名方塘水淨看魚躍幽谷風和聽  
鳥鳴世路近來多委順諒君應不負平生

送君鳴鐸振嘉禾因憶當年向此過聞說士風猶復

爾不知文體近如何人傳伊洛新條教壤接蘇湖舊  
範模叶老我山中無一事東風傾耳聽絃歌

誕日偶作

六十春秋倏忽過年來無柰老狂何婆娑竹下時爲  
舞潦倒尊前每放歌坐卧自便新野服逢迎久謝舊  
宮羅浮雲世事真如夢點檢平生已覺多

殘冬有感

江村蕭索逼除年忍見饑寒滿目前遜世不須思獻  
策趨朝曾及聽鳴鞭擁衾此日朝慵起撫枕尋常夜  
不眠惟有庭前舊松竹却逢霜雪倍新鮮

寄金元功春元

白雲林壑久藏身  
洞口桃花幾度春  
三徑菊松依舊在  
主一川風月屬閒人  
天涯浪跡難知己  
海內傳經孰最親  
此日憐君能念我  
折梅聊寄越江濱

贈湯君陽學博

才名蚤歲已知君  
大雅文章自不羣  
視學明光應有待  
校書嶽麓暫相親  
東吳學政推胡瑗  
西蜀玄經頌子雲  
臘去漸看春日暖  
還期蘭館共清芬

謝王仲山惠月林雙鶴圖

春來正憶王摩詰  
忽漫開圖慰苦心  
雙鶴擇枝歸舊

壑孤雲橫月落空林  
輞川清曠憑游覽盤谷幽深縱  
嘯吟不是古來崇隱遁高人何事特相尋

答范中方提學

雲間才子希文後名與當年二陸齊  
正想風神迷遠望忽裁雲錦慰林棲  
三吳工匠元推讓兩浙人文屬品題  
爲問舊時門下士只今誰可侍金閨

贈蔡溟陽學博

春山無伴季通來千樹梅花正盛開  
對酒不妨容我縱著書端合待君裁  
相逢草閣元非署歸去芹宮半是苔  
湖海只今風浪急願須珍重濟川才

送禮僧住華藏

梵宮蕭瑟太湖陰  
卓錫今逢支道林  
一徑慈燈通浩劫  
滿空香雨滌塵心  
聽經松際遙聞磬  
說偈臺前徧布金  
老我悟來無住着  
春深還到上方尋

附韓湘子降鸞贈詩

解脫諸緣早挂冠  
太平林下此心寬  
坐看雙鶴亭前舞  
笑指孤雲天外還  
一曲紫芝三酌酒  
三竿紅日一身閒  
總然物外有真樂  
爭似夫君方寸間

三月三日燕陳志槐園亭

上巳城南花盛開  
傾城士女出郊來  
朱顏叢裏遙聞

調白髮尊前對舉杯且向竹溪追六逸都忘麟閣望  
三台漢時長者推陳寔幾度相逢獨惜才

秋日閒居

山居雨過倍生涼時到中秋桂自香開卷不知年  
老杜門真與世相忘尋常放鶴雲千仞忽復觀魚  
一方更愛庭前新種竹夜深和月上虛窓

與蔡溟陽登惠山贈別

越志十年方脫稿夏初攜伴一閒行慧山雨過松篁  
翠震澤雲收島嶼明老我精神非伏湛美君文學逼  
康成暫歸攜李重開講願及春來聽早鶯



題畫

春來多雨淹虛室喜見前人讀易圖已悟先天無一  
畫獨憐後學有殊途曾從朝市嗟朋聚豈向山林厭  
睽孤祇恨藏身猶未密談玄時過子雲徒

柬王秀才

聞道山陰王子猷經年不放剡溪舟憐才老我空相  
憶乘興多君未共游三代文章追渾灝六朝詞翰見  
風流蓬門爲掃新開徑肯輟披吟一過不

中秋寓金陵感懷二首

月到中秋分外明夜涼如水露華清淮南叢桂爭先

發澤畔幽蘭尚未傾戎馬頻年悲轉戰笙歌何處樂  
昇平可憐杜甫清宵立獨聽鄰雞野哭聲

往年避寇秦淮上歸去重來轉覺空星散故交無幾  
在月明今夜有誰同草簑自分甘終棄軒冕人猶嘆  
未逢俯仰流光真瞬息君平何必論窮通

胡梅林以雙鶴見惠附謝

秋風雙鶴下瑤臺曾是淮淝助陣來聊伴陶潛在人  
境還從阮肇入天台舞穿幽徑千竿竹踏破衡門滿  
砌苔引頸長鳴向寥廓擇棲猶戀上林梅

送康子全考試山東因便道會試

錢塘博士西江彥倚馬能書一萬言我昔知君自鄉  
校君今念我過山村漢廷三老行開閣魯國諸生已  
在門春到上林花盡發官羅先捧御前尊

閒居偶成

東京禁錮已書名苟爽何爲御李膺老去索居常謝  
客年來枯坐不傳經清香一炷消長晝苦茗三甌解  
宿醒爲語舊時門下士雀羅村巷幾人行

暮春偶成三首

無奈清閒白晝何匡牀一夢醒南柯前村忽起騎牛  
笛隔水遙聞鼓棹歌雨過竹籬新笋出春歸苔檻落

花多倦中謝客門常掩唯許談玄道士過  
年來不用聞雞舞日上東窓睡起遲隨處適情三酌  
酒有時信手一枰碁放懷對客常捫虱得意忘言懶  
賦詩九十春光憑去住花開花謝亦何知

性甘寂寞住山村日到中時未啓門自足棲遲原憲  
室何須游覽辟疆園溪邊獨坐觀魚樂林下閒行聽  
鳥言莫謂索居無伴侶解人羣鶴舞前軒

許石城年兄以詩見示悵然有懷

竹風吹暑不知熏瞻望秦淮共白雲上苑看花多作  
伴空山對雨獨思君正憐玉樹三秋隔忽枉瑤華五

色文杜老豈真緣性僻近來嘉句屢驚聞

石城對白髮有感以詩見寄次韻

漢廷曾共賦金莖轉眼相看白髮生我漸從心方自得君將耳順不須驚策名往事嗟何及學道初心冀晚成幾度憑闌憶知己無緣即晤各含情

秋日感懷

蕭索秋風吹敝廬才荒不復賦閒居今來古往憑誰變地下天高只自如少日博聞皆忘盡老年玄覽亦消除尋常坐卧無他適頻向清溪學釣魚

寄萬履菴

與君相別是何年  
物換星移幾變遷  
寄跡只從黃葉裏  
懷人猶在白雲邊  
往時曾苦千般障  
此日都消一切緣  
試問荆溪舊知己  
秋深容放子猷船

再疊年字韻答萬履菴二首

山花開落自年年  
寒暑光陰任屢遷  
壯志盡從消物外  
幽懷常自到君邊  
天涯隨處非無識  
鄉曲何人是有緣  
江左風流今不減  
相期同汎五湖船

強壯相逢忽暮年  
中間時事幾更遷  
朝簪久謝鷓鴣侶  
野服常依竹樹邊  
物理盈虛應有數  
人生離合豈無緣  
太音唯許鍾期聽  
肯逐新聲過別船

次韻答鄭石南兼柬王仲山

綠蘿深處訪幽蹤，步入松關第幾重。  
忽遇鄭虔心欲醉，更逢王粲興偏濃。  
揮毫詞逼東西漢，投錫禪空南北宗。  
凌跨還期游五嶽，相攜同上最高峰。

寄許石城

初度君當六十年，遙聞讀禮未開筵。  
壽安紅蕖應如舊，羅漢青松倍勝前。  
春酒盈尊遲日獻，暮雲停樹逐時懸。  
秋深擬放蘭陵棹，遙向長干共醉眠。

輓讓公

斷蓬曾借草菴居，四十年來不改初。  
僧臘竟同流浪

去禪心應在涅槃餘散花上界元無住飛錫真空任  
所如此際大顛方自適昌黎何必重嗟噓

初夏同王仲山飲綠蘿菴中與楊三徑表丈  
話舊

每憶親庭夜合花關西邂逅卻金家百年故舊情何  
切一代才華會更嘉行看水痕青草長坐談日影綠  
蘿斜片雲忽送城南雨乘醉登舟興未涯

次韻答許石城四首

從來踈散不宜官猶是當年禮數寬束帶見人頻覺  
懶杜門謝客始爲安班生尚恨輕投筆陶令應嫌晚



挂冠一卧北窓常晏起那知紅日已三竿

世路爭名太不禁歸來非是厭朝簪自甘江左耕春  
雨莫效關西卻暮金一畝宮牆聊設榻十年松竹已  
成林故人只在秦淮上二水三山雲樹深

獨上層臺聊豁目青霄萬里片雲輕烏鴉羣噪應何  
意白鶴雙飛自適情促席園林梅雨潤捲簾樓閣竹  
風清海翁自是忘機者日伴沙鷗若故盟

採山釣水真堪飽不羨何曾食萬錢自信年來多樂  
事始知夙昔是塵緣溪邊對酒邀明月竹裏烹泉起  
暮煙誰謂希夷長好睡興來終夕未曾眠

立秋日作

山齋又見起秋風炎暑旋消萬慮空盡道邵雍真逸  
老獨憐种放似田翁青蠅久向樊間避白鶴時從竹  
下逢虛靜頻年聊自得何須丹訣學還童

夜坐

秋雨新晴月倍明夜深獨坐思逾清往年奔走真如  
夢此日逍遙自適情草樹含芳旋復變雲霞成象忽  
多更古來無數豪華客不及漁樵隱姓名

贈王龍池兵憲

人才自昔稱三晉獨喜年來更見君常說蘇州韋刺史

史今逢江左鮑參軍  
潢池賣劍皆歸化  
渤海投戈盡好文  
我在山中勞枉過  
每依玉樹挹清芬

修宋鑑龍池遣人侍書奉謝

歸來倏忽幾秋春  
坐卧尋常樂性真  
林下豈開脩史局  
臺中猶助侍書人  
河汾幸與王通遇  
涑水應追司馬塵  
不是晝長無一事  
敢將蕪陋續先民

病起望川兄攜酒叙飲

秋深病起菊花開  
不見王弘送酒來  
自有鄰翁頻扣戶  
爲攜家衆共登臺  
壺觴滿注皆新釀  
菜果成堆盡自栽  
禮數相忘真樂在  
夜分猶競進餘杯

病起有感三首

少年徒負洛陽心，詎意平生竟陸沉。  
秋圃黃花聊對酒，夜窓明月自彈琴。  
且尋弘景山中樂，莫效靈均澤畔吟。  
世事循環無了日，直從開闢到于今。

壯遊未遂平生志，廢棄歸來已八年。  
圖籍漫收茅屋裏，夢魂不到玉堂邊。  
杜甫故人書斷絕，翟公荒徑草聯綿。  
秋風自有鱸魚美，不惜囊中買酒錢。

憶昔少時徒自許，因循歲月忽成翁。  
光陰已過方知惜，變故多經尚未通。  
自可晝藝希范老，莫將脫粟待胡紘。  
幸今謝去門常掩，坐卧青松翠竹中。

寄袁定山

汝南袁閫今何在憶別春曹已十年兩地有懷唯皎  
月一心無累共青天崎嶇蜀道應燒棧只尺吳門欲  
放船獨坐思君何處切秋風細雨菊花前

冉通府歸蜀過訪山中因贈二律

憐君別我到山中瀹茗烹泉興不窮鹿向竹林深處  
卧鶴從溪水曲邊逢開軒共喜清風至解帶相忘俗  
慮空此去峨嵋山上月好分餘彩照江東

嘉陵江上水偏清詞客歸來一棹輕世路憑誰誇險  
要山林容我樂平生甘棠城下思方切薏苡南中謗

自明萬里長空秋月色莫因雲掩論虧盈

壽許石城六十

六十重逢甲子年又歸林下作神仙  
南宮姓字朝中羨吏部文章海上傳  
堯代許由能遂隱晉時安石肯容眠  
歲星旋轉繞初度功行于今滿幾千

秦明石以近作見示奉謝

潤州太守古循良時有新詞逼盛唐  
爲政遠過韋應物讀書不數段文昌  
咨詢猷猷留情切聞適江山引興長  
可愛詩筒頻寄我調高猶自憶師襄

送徐士彰會試

朔風歲暮向長安游子寧辭馬上寒豈是讀書誇倚  
相亦非彈鋏效馮驩崔苻刀劍方充斥道路流移正  
創殘好去彤廷獻長策冕旒正想得人難

贈祝奕士

久歸林下已忘機逢着山人喜看碁下子後先雖審  
勢推枰勝負不關時能醒槐國盧生夢勿繫長安杜  
甫思只尺芙蓉湖上路往來形跡莫教稀

贈方清泉

山人新築灤西東青草盈門似翟公一卷素書常自  
讀幾盃濁酒更誰同何須珠履三千客獨喜清泉五

十翁但願百年頻往復江湖隨處共春風

秋日感事

長安一夜起秋風吹送樓船到海東轉眼繁華渾是夢快心事業總成空胚胎自信皆由我陶鑄誰言盡屬公天地始終應有數蜉蝣何必論窮通

壽華晉齋六十

早年曾共若翁游最後逢君正學裘流水調高人  
不識凌雲賦就孰爲收詩書偏閱三千卷甲子俄經六十秋願約相攜同煮石杖藜頻過碧山頭

除夜感懷



六十九年成往事明朝七十又逢春經綸已是孤初  
志俯仰寧甘負此身一點浮雲憑去住千年重擔屬  
何人從今務竭平生力步步應須要認真

壽鄒聽天室人八十

昔年曾上聽天莊詩藁千篇堆滿牀已說雞鳴捐珮  
玉今聞鶴髮傲冰霜清修教子成高隱苦節持家散  
謾藏慚余豈是東方朔白海灘頭見采桑

壽醫士呂春林八十

春日山林萬樹青芳菲深處有幽亭道人自是華佗  
侶識者稱爲南極星一卷丹經懸肘後雙飛白鶴舞

前庭從今歲舉蟠桃宴天漢金莖露正零

壽秦次山六十

南都聯署君方壯忽漫看君六十年不羨黃金同作  
帶獨憐白髮共垂肩錦湖秋月芙蓉裏繡嶺春風楊  
柳邊歲歲相攜頻玩賞何須海上問神仙

贈劉心垣

劉晨采藥天台去逢着仙人却又還黃帝素書懸肘  
後赤松奇術出人間無多營業尋常樂除却行醫盡  
日閒獨喜鄰翁常對奕有時監局過溪灣

贈梧室老僧

少時曾憶上方游  
老衲童年髮尚留  
塵世功名麻  
月空門香火幾春秋  
元知軒冕多機械  
終是袈裟勝  
錦裘明鏡菩提總  
無物坐看南極日悠悠

方山薛先生全集卷六十六

詩

七言律

送許吏部擢廣東僉憲備兵欽廉

送君前月燕山道忽漫看君度粵州  
世路何心憑去住江湖隨處任夷猶  
桄榔日煖昭行色銅柱雲高豁壯眸  
莫謂海南程更遠好將音信寄林丘

鄭伯原北還

一別盱江廿載餘鄭虔需次赴公車  
文章已奏絲綸閣名姓初收注選書  
抱道不嫌官獨冷甘貧休歎食

無魚漢廷博學今誰是不久還君賦子虛

人日萬履菴枉過叙論

凍雪寒梅野老居春風忽枉故人車旋挑野菜嘗新  
酒脫却塵緣講舊書十載相違頭盡白多方徧歷志  
仍初因思海內交游者不識于今有幾如

三月八日胡郡推招飲

前川花柳正芬芳却入城中傀儡場席上不閑新禮  
數人前猶着舊冠裳年來處世多隨俗老去聞歌倍  
感傷客散歸來方自得坐看明月轉迴廊

舟中偶成

城中兩日始還家漸覺春深感物華獨對青山容我  
老敢將白髮向人誇蒲河水浸桃紅片兩岸風吹楊  
白花徙倚篷窗無一事竹爐吹火煮新茶

鄭石南六十自詠二首次韻壽之

羨爾生涯硯作田文章風格紹前賢漫游人世曾何  
意每過吾廬獨有緣共對青樽常徹夜相看白髮幾  
經年近來已得喬松訣那用追尋海上仙

唐室何人薦馬周頻年抱璞太湖頭春秋六甲憐初  
度詞賦千篇壯遠游靜悟盈虧天上月閒看起滅水  
中漚無生便是長生理不必空傳王母籌

賦得蟠桃詩一首壽錢母

白塔山高春日晴蟠桃一樹簇朱英誰傳度索仙人種我道鹽官壽母禎摘去曾疑東曼倩攜來應是董雙成婺星南極光相向歲歲花前徹夜明

得邸報見邊臣上俺答求貢請封疏

聞道單于款塞來江湖北望獨徘徊請纓欲繫名王頸伏劒誰當屬國才李廣數奇空將畧馮唐年老愧嬰孩先朝故事今知否幾錫封章幾受猜

賀馮五溪六十

南極明星照五溪烏紗白髮映漣漪早逢世代三朝

盛初度春秋六甲齊竹葉樽中浮綠蟻梅花谷口  
黃鸝前村老我歸田久時願相過曳杖藜

次韻答鄭石南

自笑當年屢問津漫從京國走黃塵歸來畎畝甘樵  
牧坐對溪山作主賓徧插黍苗連日雨頻傾竹葉滿  
懷春鄭虔忽過多詞賦海內憐才有幾人

贈湯少泉醫士

中冷泉上有幽人少學倉公悟入神頂上黃光常日  
見眉間紫氣逐時新五千文字探玄理三百詩篇樂  
性真誰謂當年丘未達君如饋藥定相親



丙寅元旦有感

削籍歸來已十年每逢元旦憶朝天自憐白髮恩猶  
被豈必黃封勅再傳敝屋旋更先剩業薄田盡屬俸  
餘錢賈生原賦長沙命絳灌何曾肯蔽賢

病中三首

病暑經旬忘盥櫛秋風忽起井梧邊草迷荒徑人希  
到竹覆閒窓我獨眠靜極常聞天籟響悟空久斷俗  
緣牽一時夢覺關俱透無復槐根似往年

每當盛暑偏多病一遇嚴冬轉覺甦自是山人元僻  
性非關造物有殊途厭看純綺誇新製甘着菅蔴保

故吾寒暑從來更代謝不因趨避有榮枯  
衰殘多病杜門居靜聽兒孫盡讀書  
餽粥自憐瓶有粟菜羹不厭食無魚  
周程風月千年在管晏功名一笑餘  
莫謂溪山偏寂寞扣關時復過樵漁

贈方清泉地里

山川自古生豪傑妙解無如郭景純  
嗟我久爲林下叟逢君却是個中人  
清虛大塊經千變滄海桑田復幾春  
世上更誰觀化者閉門獨坐轉沉淪

獨坐偶成

歸來出處不分明靜裏思之氣自平  
竹榻拋書便午

卧瓦壺攜酒愜春行才非周到寧甘拙學未深探敢  
盜名獨信此心無愧忤逢人何用說平生

歸來出處不分明靜裏思之氣自平草樹叢中堪寄  
跡水雲深處漫怡情北邙荒落三公塚南國淒涼六  
代城任爾朱輪華轂者百年光景亦俄傾

丁卯八月十四夜有感

憶昔少時當此日淮清橋畔漫追隨晴空無暇看明  
月雨夜偏多染污泥白璧含光徒自許青萍吐氣有  
誰知中年偶爾逢相識無奈風波更嶮巖

偶述

解組歸來十二年荷鋤時出種湖田心須頓悟方知  
命學到忘言却類禪瓶罄常漙沽酒債囊空惟伏賣  
書錢旁人莫道生涯拙俯仰無營任自然

經二泉先生故宅

尚書門巷已淒涼無復當年舊講堂遺像僅存周幅  
烏荒祠猶擬魯靈光西風颯颯吹黃葉寒雨蕭蕭暗  
白楊不獨從游二三子路人經此亦悲傷

壽高筠莊長史

我愛白頭高相國蚤年名姓勒賢書謝官不羨王侯  
貴遁跡唯便隱逸居詩句遠追三百首玄言近讀五

千餘從今八十傳真訣直煉元神合太虛

壽馮處士

夜來推步窺南極照見梁溪分外明應是祥光凝壽域  
頓令和氣滿春城碧桃花裏仙人聚玉鬚尊前貴客盈  
誰謂馮唐容易老黃河行見幾廻清

寄包同州

使君前歲同州去倏忽春光已易三  
江左風流元自適關中土俗要湏諳  
每思上郡河山壯猶憶當年稼穡甘  
謂線米更有說經臺最勝不知政暇可能探

得顏冲宇書

百花深處方高卧忽得慈谿顏子書慨昨世途多彈  
射幸今踪跡混樵漁山林落落誰爲主湖海茫茫孰  
啓予吳越往來非遠道可能移棹慰離居

贈菴僧

古殿蒼藤繞梵煙誌公卓錫幾何年真容每見黃金  
相法典猶傳白馬篇虛席久違靈徹教空門今羨貫  
休賢談禪我昔頻過此曾記眉山帶已捐

夜過無錫

乘閒偶放梁溪棹霜落長空月正明獨對孤燈聊自  
酌浩歌一曲少人聽不知歲晚寒暄改無復人間寵

辱驚五十年前朋舊盡誰憐白髮抱遺經

送萬履菴復出

東山再見徵安石海內蒼生望治平  
天市快瞻卿士月少微勤恤庶民星  
頻年館閣多遺逸此日賢良盡彙征  
白髮故交無所贈聊爲短賦壯君行

龍岡郡公顧太虛草堂

荒野孤村逼歲除蕭蕭竹樹掩寒廬  
獨攜筇杖登虛砌忽報干旌問索居  
洗爵留嘗新釀酒開軒同檢舊藏書  
王弘曾入陶潛室不識風流有此如

郡中分遺春酒附謝

郊迎春色入蘭陵四境謳歌頌太平西漢文翁開絳  
帳東園隱士抱遺經獨憐欹枕遠華宴遠荷傳觴到  
草亭莫謂野人無以報梅花相贈數枝清

壽許石城七十

石頭城裏僊人宅初度懸弧七十年門下羨君多獻  
爵山中遲我未登筵五朝禮樂同逢盛一代文章獨  
讓先自信松喬應不老還期頻醉菊花前

送劉子延太學秋試

憶昔曾爲六館生今朝又復送君行綠槐御道聞鶯  
囀丹桂僊宮聽鹿鳴壁水橋前爭識面瀛洲會裏羨



題名校書天祿從茲始重見當年太乙精

秋夜感懷

梧桐秋月夜初長病暑山人頓覺涼林甫何須誇鼎  
鵲陶潛元自住柴桑枯荷忽聽鷓鴣起蔓草空憐絡  
緯忙欹枕可堪思往事古今多少是興亡

園中偶成

荒野園扉常閉關何須海上去尋山晝長淨榻幽人  
卧日暮空林倦鳥還夜月青松孤鶴白秋風黃葉二  
毛斑幾株桂樹花齊發把酒更深興未闌

方山薛先生全集卷六十七

詩

五言絕句

對雨

山雨鳴秋草江風吹客衣  
獨憐雙鶉鴿時傍曲闌飛

夜坐

久坐微風發涼生  
桂樹枝那鄆今夜月團扇泣班姬

懷歸

雲暗秋堂暮清燈白苧衣  
家人懷故國相對只言歸

東縣尹陳禹成差人除草

潯陽流落客荒草倩人除但得濂溪意空庭亦自如

宿省中同廖東溪觀芍藥二首

長年春暮景好作舞雪游今日看花伴還同省署幽

二

藥欄花盛放顏色最堪憐待到明春發應思考課年

謁岳墓二首

奸宄能傾國丹心難悟君獨憐樵牧豎省說岳王墳

二

國是憑誰定忠魂不可欺至今墳上樹猶作向南枝

園居雜詠十二首

病中常不寐徹夜獨躊躇追憶平生事滿懷難盡書

二

夜靜人無語風吹竹有聲披衣開戶看明月滿前庭

三

一病淹旬月園林草色深朝來喜勿藥攜杖一登臨

四

世事如流水人情似過雲病魔憑去住應不擾天君

五

松間聽鶴淚池上看魚游竟日無人到園林景自幽

六

平生耽寂寞今始遂初心不是知音少林深何處尋  
七

衰草經秋雨庭前綠更滋獨憐人易老華髮忽成絲  
八

甃石漸成山疏池一水環詎云供玩賞聊以伴吾閒  
九

平生不善奕心事本無機聊以消長晝逢人信手揮  
十

閒中思往日到處逐人忙百慮歸何處年來盡坐忘

十一

九月禾黍熟農人慶有秋不堪連日雨漸見穀芽抽  
十二

野菊滿籬邊秋深色可憐呼童莫芟去攜向曲欄前  
夜坐二首

獨對寒燈悄開窓夜色深如何猶不寐明月照疎林  
二

歲序催人老幽懷有所思故交零落盡寰海幾相知  
懷舊十首

泉齋邵老師束髮荷相知昨過冉涇里頽祠漸不支  
二

高陵呂夫子溫淳類大程前年關陝去不復見儀刑

三

三原馬伯循古朴葛天民入關猶及見倏忽隱星辰

四

安陽崔子鍾慷慨故人風綠竹亭猶在身歸馬鬣封

五

南海黃才伯春秋倚相材已聞觀化去無復東書來

六

溫陵王道思雅志古文詞剩有經綸學不爲時所知

七

蕭關趙景仁慷慨任天真近得秦中信令人倍愴神  
八

應德歸何處子沾竟沉淪年來入城郭誰復可相親  
九

東葑華世卿十載共寒檠分明黃叔度零落不知名  
十

汾陽孔汝錫近闊寄來書相隔三千里猶能慰索居  
夜過橫林

月白砧聲遠天空鴈影斜扁舟橋下過燈火兩三家

登惠山



黃葉村中景黃花雨後天  
樞衣登絕頂秋色滿湖田

暮春偶題

千林齊放葉百鳥盡嚙花  
我獨何爲者悠悠只在家

即事

穀雨茶初至山僧適送泉  
年來甘寂寞難遣靜中緣

聽鳥

好鳥應何意林間宛轉鳴  
分明憐獨坐長日共幽情

養魚

鑿池三四畝聊試種魚經  
豈爲供厨饌閒中可適情

方山薛先生全集卷六十八

詩

七言絕句

逢女子走馬二首

蜀錦斜纏雙鳳鞋迎風躍馬下長街  
自稱世襲將軍胄不是秦淮賣酒家

玉容流汗濕紗衣翠袖蹁躑舞落暉  
鞍馬本非儂慣習近從夫婿出征歸

寄來子禹

美人西去已春深百里雲陽聽必琴  
憐我空山還獨

坐繞門花草戀知音

德慶山房看花二首

十年爲客住山家纔見薔薇五色花  
獨愛老僧甘寂寞閉關猶自補袈裟

紅花誰名十姊妹山窓雨後相新鮮  
若將攜向昭陽殿飛燕看來亦自憐

訪曹戶部四首

憶昔曾同子建游碧梧涼月故園秋  
十年岐路悲離別今日相逢又客州

省郎新賃茅堂僻衝雨閒過竟日留  
乳燕似聽人話

舊謾隨黃蝶度簾鉤

燕市歌鐘長日聞江東獨客卧看雲東鄰喜見曹司  
戶染翰脩辭織錦文

過雨山榴當戶開古槐踈冷覆青苔狂夫也識冠簪  
貴多病思家日幾迴

送陸道士南歸二首

星斗壇空玄鶴驚山人遙向鳳皇城紫芝瑤草雲中  
室何事黃塵道上行

燕市秋風百草黃衝星騎馬拜明光雲帆羨爾東歸  
去更向深林倚石牀

放鶴亭二首

放鶴亭空繞白雲松門煙霧盡成文羽衣不見江東  
客吹笛何人隔嶠聞

秋深仙榭水雲間去住無心盡日閑獨對孤山思舊  
主梅花零落竹枝斑

西湖四首

彩鷁參差泛落霞明粧炫服盡官家茅篁空闌流亡  
戶愁對寒城啼暮鴉

少婦採菱歌竹枝相逢羞澁轉顰眉小姑索食儂來  
此不比大堤諸女兒

西掖曾陪獻策臣  
珮環猶是昔年人  
風煙此日甘漂泊  
吳越諸生共隱淪

孤山樹合仙人宅  
雙塔雲開玉女臺  
小艇中流風欲定  
謾隨鷗鷺一徘徊

夜渡錢塘蕭蕭山遣人候于江上因邀至僧舍叙飲留別二首

寒風吹雪滿蕭山  
鐵戟文裘夜度關  
尊酒相逢江上使  
肯將行路說多艱

竹林荒院水雲陰  
老衲烹泉煙霧深  
岐路雪花憐別袖  
越山指點碧千尋

寄答張秀才二首

錦城仙院幾相過  
別向燕山恨轉多  
夢裏空歌折楊柳  
鴈書西去竟蹉跎

海樹山城雪作花  
風塵孤吏不攜家  
青年文苑張公子  
錦鯉情深越水涯

贈吳峻伯二首

玉華山頭孤月明  
雲裾驟鶴九天行  
浪吟商羽無人  
和遙憶知音度越城

海邊風急暗黃昏  
雪凍山衙早閉門  
獨抱瑤琴空歲暮  
朱絃流水爲君聞

同陳時偕登匡廬二首

獨愛多才陳子昂  
曾同作賦獻明光  
匡廬六月泉飛雪  
聯袂深松倚石牀

暑月空山草樹涼  
孤雲直北見潯陽  
何人放鶴橫江去  
白羽青霄萬里長

道山亭

清秋亭榭倚危岑  
落照晴霞海色深  
百粵山河廻曲檻  
滄瀛蓬島恍登臨

鄰霄臺

石磴雲深路鬱紆  
振衣飛鳥入天衢  
窮高翻覺傷孤



獨愁見仙人種白榆

蟠桃塢

曾聞海上蟠桃樹不見蟠桃塢裏栽豈是玉衡星未  
落漫教方朔入山來

宿猿洞

憶昔畜猿人已去空留石洞護青蘿不嫌荒落無踪  
跡更苦猿聲隔嶺多

粵王山

斷雲衰草粵王城蒲樹寒鴉噪晚晴寂寞荒臺秋色  
裏居人猶說尉佗名

過劔浦驛問龜山書院與人謂在將樂縣封  
山下相去二百餘里

劔浦舊聞楊子宅與人今指在封山百年身世憐吾  
道猶恨孤蹤往復艱

同項生游武夷二首

玉女峯前草木黃溪流曲似九迴腸憐君同汎游仙  
擢羽客攜觴過夕陽

秋暮空山黃葉飛夜深燃燭照荷衣美人宛在煙霞  
頂玉露窓寒鎖翠微

聞鴈

潯陽旅夜聞啼鴈荒院寒燈樹浦霜孤跡天涯憑去  
住黑貂零落鬢毛蒼

九日汪經歷招飲海天寺次韻二首

九日重登庾亮樓楚門遙望洞亭浮黃花應笑長爲  
客去歲今朝百粵秋

丹楓江郭倚危樓客裏重陽灝氣浮獨有汪倫憐李  
白攜壺漟菊漫吟秋

元夕次道思見寄韻

潯陽孤客久思歸燈市無情早掩扉千里故鄉今夜  
月夢中恍惚是還非

德安道中避雨民家

茅屋人家掩棘籬  
旋燒松葉午蒸藜  
兒童見客驚相問  
風雨長途何所之

送內東歸

豫章門外送君行  
千里相思兩地情  
此去高堂應問訊  
爲言游子滯江城

送邵山人歸越山人善卜筮館于王職方職  
方言其有邵金之操作二詩貽之

邵子西來依右軍  
閉門長日讀三墳  
自言到處皆玄理  
不入成都賣卜羣

歲暮憐君出石頭北風吹霰暗城樓負薪不拾遺金  
去始信于今有被裘

舟泊胥門玉峯翁枉顧感賦二絕句

獻策當年第一人 孝皇親命侍楓宸歸來久作青  
山主猶誤憐才到水濱

先朝元老幾人存海內知公道自尊 當宁拊髀民  
望切竟同梅福隱吳門

姑蘇驛前別李生懋卿二絕句

百里依依惜別情愁聽子夜權歌聲秦淮與汝同爲  
客今日吳門送我行

長干寺裏憶相隨誰道冬來竟別離  
後夜思君何處切錢塘江上月明時

桐溪夜泊

夜深孤櫂泊桐溪明月清霜照石堤  
木落江空行客少隔林唯有白猿啼

宿圓通寺

一別匡廬忽八年重來泉石總依然  
山僧猶記當時事說向燈前似有緣

華師魯以詩見贈次韻答之

近來學問總離支浪許經綸匹管伊  
獨有堯夫無一

事弄九餘暇自吟詩

水南邀登君山二首

初夏新晴江色明巖居學士共登瀛長安極目無窮  
思漫向沙頭倒玉甌

海內人稱張曲江才華真是世無雙碧山此日攜仙  
侶同看星壇五色幢

君山贈水村蒲澗右江三道士三首

山樹葱蘢水上村道人長日不開門五千文字從頭  
讀一任花飛玉女盆

叢生蒲葉澗邊青長挹幽芬養性靈洗盡塵煩無一

事晝長睡起讀黃庭

夕陽仙院傍江流  
函谷西來紫氣浮  
對汝却疑關尹子  
頻操楮墨問青牛

瑤瑤寺四絕句

瑤瑤西遷太乙宮  
閒泉依舊繞孤峯  
爲尋圓法師何在  
石塔空留落照中

山路迂回傍水涯  
竹林深處有僧家  
空門盡日無人到  
唯見寒梅一樹花

山中春到自芳菲  
況有僧房在翠微  
便可依栖了生事  
更從何處問禪機



往復西湖幾歲年每游輒恨俗情牽于今已悟無生  
理一任閒忙自灑然

鎮原公館次壁間韻

荒堞晨喧餓雀聲征徒吹角促西行可憐江左清瀟  
客欲請長纓空有情

垂垂草樹露珠零殘夜披衣月在扃擊劒聊爲歌出  
塞四山閒寂少人聽

無題四絕句

造物從來忌太誇緋桃綽約爛朝霞春風豈是無生  
意吹落枝頭第一花

天雲成象夏多奇不覺空中忽轉移漫道從龍作神  
物却隨黃霧下山嵎

狂風吹漲滿天雲一鶴橫空獨不羣赤壁磯頭征戰  
地長鳴寥廓動三軍

胡天飛雪暗陰山不斬單于誓不還忽報昭君將出  
塞漢廷有詔六師班

題石城種松圖次陳鳴野韻

千巖萬壑護深林中有幽人自鼓琴流水桃花真隔  
世種松聊結歲寒心

題黃省菴畫景五絕句

到處山城聞鼓聲羣鳥飛向夕陽隄上林豈是無高  
樹去住何心任所棲

秋盡瀟湘夜有霜滿灘蘆荻葉初黃漸鴻雁幸無羅  
網失夢何曾到稻梁

鳬性生成元好潔日將毛羽刷清波縱然不作王喬  
鳥猶恐鮮明惹忌多

豆莢垂垂豆葉青紫花猶放兩三星豆莢故着秋重  
嚙免致相煎釜裏聽

披圖忽見北堂花綠葉青枝爛紫霞任是有憂渾忘  
却人生行樂更何嗟

綠蘿菴十二首次王仲山韻

謝却諸緣看水流此身如寄總虛舟  
東風郊外桑麻徧猶共農人說有秋

囊琴不必有知音獨坐深山花滿林  
明鏡無臺何處問虛空消盡見真心

虎溪止水淨無瀾照見秋光樹影殘  
一任苦空元自得有人披衲坐蒲團

自從山谷掃煙霞長日晴空見雨花  
萬法本來無一法風鈴何必問僧伽

六塵深處有根源莫把心經恁地繙  
煩惱菩提元一

樣會通去處更何言

原無南北與西東可柰身隨萬象中此處若還能透  
出便離炎火濯清風

大患誰云爲有身看來還是在迷津若論生滅俱饒  
舌會得無生自有人

松門猶自挂蛛絲安得謀生有歇時獨有寒蟬唯吸  
露伐檀無用賦漣漪

臺前設食施飛禽魚却驚綸避水深羽躍鱗潛何厚  
薄一時明盡愛憎心

學人莫說鈍根遲省發由來在片時五蘊皆空真

了現成公案豈難知

世人盡說佛從西一葦西來何處棲面壁九年誰解得東方亦自有曹溪

穠郁春光落寞秋半生空自逐人遊于今已作忘機者盡日無言對水鷗

次韻答僧果斌二絕句

謝却微名久在山年來贏得此身閒客來莫謂無尋處不出白雲深樹間

山田連歲稻苗肥抱甕無心久息機昨有高僧傳偈至虛空不見一塵飛

贈錢碁士

愛汝江東稱國手相逢林下說玄機  
古來多少興衰事總是閒中一局棋

興平道中二絕句

興平道上此經行黃葉斜陽倍愴情  
尤物幾危唐社稷

後來閣豎又潛生

楊妃劉瑾皆興平人

百二山河亦壯哉偏經此地獨徘徊  
武皇納諫知幾早不落玄宗路上來

次華師魯韻二絕句

根源在我更何思涵泳從容便自知  
獨喜秋深君忽

至開緘况復見新詩

海洋有岸在回頭不爾茫茫轉更悠  
易簡支離姑勿論且將自己放心求

登朔方臺

無定河東盡草萊旋師一上朔方臺  
扶蘇太子留遺築嗚咽泉聲似舉哀

九日與晉齋論學

重陽未見菊花開那得王弘送酒來  
邂逅故人相論學竹林斜日不知回

次韻謝晉齋送新米